

Lis oubreto en vers

FLOUR DE SÀUVI

1850 — 1863

Salvia salvat.

LIBRE I

I. — A Jan Reboul, de Nimes

Reboul, ai proun canta roso e margarideto,
Si front poutouneja pèr li mòlis aureto,
Lou vòu de parpaioun que ié viro à l'entour;
Proun ma muso, en jougant long de la ribo en flour,
Lou matin dins l'eigagno a bagna sa raubeto.

Aro qu'ai mi tres crous, emé lou gros pessu,
Que quàuqui flo de nèu blanquejon sus moun su,
Devriéu dire adessias à la muso ajoutido
Qu'es vengudo flouri lou printèms de ma vido,
E plus cueie de mot qu'apouncharien pa 'n fus,

Car es un jo d'enfant. Mai, se la man me prus,
Quand avès fa de vers n'en voulès toujours faire,
D'escrèure tèms-en-tèms la lengo de ma maire,
Devrien, mi vers, bounias coume un parla de vièi,
D'Aquéu qu'es eilamount fasènt ama la lèi,
Reviéuda la vertu dins lou cor de mi fraire.